

## TERZ MOND

Honduras: ena Surmirana e la sia tgesa d'unfants

## Gl'è davanto en pensum per la veta



Patricia Scarpatetti cun la gronda part digls «sies» unfants dalla tgesa «yo quiero ser...» tgi ella ò mess an peis. Tots unfants dalla veia tgi vivevan an relaziuns desolatatas.

● **pb. Igl onn 2004 cun 23 onns è ena giovna Surmirana viageida ainten l'America centrala, a Honduras ed ò luvro lò ainten ena tgesa per unfants dalla veia, manada d'en'organisaziun Svizra. Oz magna ella lò en'atgna tgesa cun 32 unfants da 9 meis anfignen 14 onns.**

## 1. part (1/3)

E chella Surmirana tgi blers canoschan e tgi vagn er gio repetei-damaintg rapporto sur dad ella e la sia lavour, è Patricia Scarpatetti da Cunter. Da mastier è ella scolasta primara ed ò er luvro divers onns sen chel mastier. Er siva chel onn tgi ella ò passanto per gidar ainten la tgesa d'unfants «El Refugio» a San Pedro Sula, en martgea honduran da ca. en milliun abitants. Turnada anavos siva chel onn ò ella puspe surpiglia ena piazza scu scolasta ed ins pansava tgi chel onn a Honduras seia sto en'aventura scu tgi blera gliout giovna fò oz en ena moda u l'otra agl exteriour.

Pero tar Patricia Scarpatetti era chegl en po oter. Las exprientschas fatgas durant chel onn a San Pedro Sula, la misergia da chels unfants innocents e la pussebladad da saveir gidar ad els, la fatschantavan. Er schi chel ageid vign tiers angal a pacs, gl'è pac duple tgi igl fav aint igl lai...Pertge digls 7.4 miu. Hondurans veivan 78.5% sot igl cunfegn da povra-

dad e 43% zont an extrema povradad. 5 miu. dad els on mintga de da cumbatter per survivever ed 1 miu. unfants èn sotnutrias. E chegl angal an Honduras. Situaziuns sumigliantas dattigl er an otras teras dall'America centrala, an America lategna, an Africa ed an otras parts digl mond. Damais veiramaintg igl fav aint igl lai.

## Far chegl tg'ins so far

Siva en onn scu scolasta an sies li nateiv è Patricia Scarpatetti puspe parteida igl 2007 per Honduras. Cun cleras imaginaziuns ainten la valischa tge tg'ella less metter an peis a San Pedro Sula. Ella leva betg turnar ainten la tgesa d'unfants «El Refugio» tgi ella cunuscheva. Las estructuras da chella e dall'organisaziun eran betg gist scu chegl tgi ella matteva avant. Uscheia veva ella la ferma voluntad da manar en'atgna tgesa d'unfants. Ainten las sias preparaziuns anc an Svizra veva ella er vurdo anturn per furmas da finanztgier igl sies project. Er schi tot è chive blier pi simpel e costa nign'ideia tant scu tar nous, schi gist sainza daners vogl er lò betg. Pertge ella leva dar ad unfants en tetg, damagler, tgira medicala e chegl tgi è fitg impurtant è ena buna scola-ziun. E chegl tot costa. E la giovna da Cunter ò catto en po per casualitad ed en po cun relaziuns en tshertgel da persungas tg'era activ ainten la bursa e tgi matteva a disposiziun ena part digl gu-

dogn per en scopo caritativ. E chel tshertgel è sto pront da dar sustign finanziar per realisar igl project dad ena tgesa d'unfants a San Pedro Sula. Uscheia veva Patricia Scarpatetti ena tsherta siertad finanziaria ed ò pudia eir vedlonder.

## Ena gronda famiglia

Patricia Scarpatetti ò savia surpiglier en bietg existent digl margea, en anteriour spital e far igl ampren gist igl pi basignevel. Ins ò alloura adegna puspe migliuro

ed installo igls indrezs electric e sanitars, fatg meirs, do calour, fatg ischs etc. Cò ò ella gia sustign da persungas indigenas scu er da persungas tgi èn neidas dalla Svizra per gidar en taimp.

Ed alloura è succedia igl principal: ella ò savia piglier ainten la tgesa igls unfants. Unfants per part dalla veia tgi eran traumatissos, unfants or da famiglias an situaziuns desolatatas. Savens dominava igl alcohol la veta digls genitours, els vevan nignas antradas e cotras betg igls daners per saveir nutreir igls unfants. E la tgesa ò er survagnia en nom «yo quiero ser...», chegl tgi vot deir tant scu «ia less esser/neir...». Damais vot la tgesa d'unfants ed igl antier project da Patricia Scarpatetti betg angal dar tetg e damagler agls unfants, mabagn ena perspectiva per la veta. E la giovna da Cunter ò survagnia sustign antras igl sies partenari indigen, Edwing. Egn tgi totga tar igls privilegias an Honduras. El veva gia la pussebladad da stibgier filosofia e teologia ed è ossa psicolog e so duvrrar fitg bagn las sias cunaschientschas an contact cun igls unfants signias dad eveniments per part sgarschevels e tragics.



En maletg tgi dei schi blier tge tgi en datgesa ed ena famiglia monta per chels unfants: sanester igl mattatsch cura tgi el è rivo ainten la tgesa d'unfants igl 2005 cun en'igleida veida dad en unfant traumatissos e dretg igl madem mattatsch ossa cun ena igleida clera e cuntainta.